



Broj:  
Sarajevo, 13.12.2021. godine

PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 14-12-2021

Organizaciona jedinica	Klasifikaciona oznaka	Redni broj	Broj priloga
		01-02-2-2179/21	

**PARLAMENTARNA SKUPŠTINA BOSNE I HERCEGOVINE  
PREDSTAVNIČKI DOM**

**Predmet:** Prijedlog rezolucije o zaštiti ustavno-pravnog poretka države Bosne i Hercegovine, dostavlja se

Na osnovu člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 26/20), podnosimo Prijedlog rezolucije o zaštiti ustavno-pravnog poretka države Bosne i Hercegovine.

Predlažemo da se u dnevni red 25. sjednice Predstavničkog doma Parlamentarne skupštine Bosne i Hercegovine zakazane za 14.12.2021. godine kao dodatna obavezna tačka uvrsti **Prijedlog rezolucije o zaštiti ustavno-pravnog poretka države Bosne i Hercegovine.**

U prilogu dostavljamo tekst Prijedloga rezolucije.

S poštovanjem,

Poslanici u Predstavničkom domu  
Parlamentarne skupštine BiH

**Dr. Denis Zvizdić**

**Nermin Nikšić**

**Saša Magazinović**

**Zukan Helez**

*Zukan Helez*

**Nada Mladina**

*Nada Mladina*

**Predrag Kojović**

*Predrag Kojović*

**Mirjana Marinković-Lepić**

*M. Lepić*

**Aida Baručija**

*Aida Baručija*

**Damir Arnaut**

*Damir Arnaut*

**Jasmin Emrić**

*Jasmin Emrić*

## PRIJEDLOG

*Imajući u vidu da su svi poslanici i delegati prilikom preuzimanja dužnosti dali zakletvu i potpisali svečanu izjavu kojom se obavezuju na poštivanje Ustava Bosne i Hercegovine i provođenje Općeg okvirnog sporazuma za mir u Bosni i Hercegovini;*

*Polazeći od činjenice da Ustav Bosne i Hercegovine kao isključive prerogative države navodi suverenitet, teritorijalni integritet, političku nezavisnost i međunarodnopravni subjektivitet;*

*Potvrđujući da je Ustav Bosne i Hercegovine u člamu III. 5. a) predvidio mogućnost uspostavljanja dodatnih nadležnosti Bosne i Hercegovine, te da Ustav Bosne i Hercegovine ne predviđa bilo kakav postupak vraćanja uspostavljenih nadležnosti Bosne i Hercegovine;*

*Smatrajući da je Visoki predstavnik ustavna kategorija predviđena Aneksom X Općeg okvirnog sporazuma za mir u Bosni i Hercegovini, zadužen za provedbu civilnih aspekata mirovnog rješenja;*

*Naglašavajući da su odluke Ustavnog suda Bosne i Hercegovine konačne i obavezujuće, te da jedino Ustavni sud Bosne i Hercegovine ima jurisdikciju da odlučuje da li je bilo koja odredba ustava ili zakona entiteta u skladu sa Ustavom Bosne i Hercegovine;*

*Ističući da su napad na ustavni poredak i ugrožavanje teritorijalne cjeline krivična djela inkriminirana Krivičnim zakonom Bosne i Hercegovine;*

*Podcrtavajući da su Evropska unija, Francuska Republika, Savezna Republika Njemačka, Ruska Federacija, Ujedinjeno Kraljevstvo i Sjedinjene Američke Države svjedoci potpisnici Općeg okvirnog sporazuma za mir u Bosni i Hercegovini i s tim u vezi imaju pravo i obavezu da osiguraju mir i stabilnost u Bosni i Hercegovini;*

Na osnovu člana IV. 4. e) Ustava Bosne i Hercegovine i člana 163. Poslovnika Predstavničkog doma Parlamentarne skupštine Bosne i Hercegovine ("Službeni glasnik BiH", br. 79/14, 81/15, 97/15, 78/19 i 26/20), Predstavnički dom Parlamentarne skupštine Bosne i Hercegovine, na \_\_\_ sjednici održanoj, \_\_. \_\_. 2021. godine, usvojio je

### **REZOLUCIJU O ZAŠTITI USTAVNO-PRAVNOG PORETKA DRŽAVE BOSNE I HERCEGOVINE**

1. Predstavnički dom Parlamentarne skupštine Bosne i Hercegovine (u daljem tekstu: Predstavnički dom) najoštrije osuđuje i u potpunosti odbacuje zaključke i Deklaraciju o ustavnim principima koji su usvojeni na 24. Posebnoj sjednici Narodne skupštine RS održanoj 10.12.2021. godine (u daljem tekstu: zaključci i Deklaracija) i iste ocjenjuje neustavnim i suprotnim zakonima države Bosne i Hercegovine, s obzirom da je Parlamentarna skupština Bosne i Hercegovine sve navedene zakone

usvojila prema ustavnoj i poslovničkoj proceduri, da su za sve navedene zakone glasali poslanici i delegati u Parlamentarnoj skupštini BiH iz svih naroda i oba bh. entiteta, te da se isti mogu mijenjati ili dopunjavati samo po istoj proceduri kako su prvobitno usvojeni, a to je u Parlamentarnoj skupštini Bosne i Hercegovine. Entiteti nemaju pravo jednostrano regulirati zakonsku materiju koja već postoji na državnom nivou.

2. Imajući u vidu navedeno u tački 1. ove Rezolucije, Predstavnički dom zaključke i Deklaraciju NSRS definiše kao napad na ustavni poredak međunarodno priznate države Bosne i Hercegovine.

3. Predstavnički dom poziva Tužilaštvo Bosne i Hercegovine da hitno reaguje i procesuiru sve one koji su javno podstrekavali i učestvovali u izvršenju krivičnog djela napada na ustavno-pravni poredak Bosne i Hercegovine.

4. Predstavnički dom traži od Visokog predstavnika za Bosnu i Hercegovinu, Vijeća za implementaciju mira u Bosni i Hercegovini i međunarodne zajednice u cijelosti da odmah reaguju i u skladu sa svojim ovlastima sankcionišu i zaustave u započetim aktivnostima sve one koji rade na rušenju ustavnog poretka i državnih institucija Bosne i Hercegovine. U suprotnom može doći do ugrožavanja mira u Bosni i Hercegovini, što može imati nesagledive posljedice za Bosnu i Hercegovinu, region Zapadnog Balkana i Evropu u širem smislu.

5. Predstavnički dom poziva Predsjedništvo Bosne i Hercegovine da razmotri raspuštanje Doma naroda Parlamentarne skupštine Bosne i Hercegovine (u daljem tekstu: Dom naroda), uzimajući u obzir kontrolni paket koji SNSD i HDZ imaju u Domu naroda koji je rezultat podrške koalicionog partnera SDA u izboru članova Doma naroda.

6. Predstavnički dom poziva NATO snage da pojačaju svoje vojno prisustvo u Bosni i Hercegovini, posebno u Brčko Distriktu Bosne i Hercegovine, s obzirom da NATO ima ovlast uspostaviti takve snage prema Aneksu 1A Općeg okvirnog sporazuma za mir u Bosni i Hercegovini.